



DEFENCES
DE
L'VNIVERSITE'
DE PARIS
ET DV COLLEGE
DV MANS.

*Contre l'vsurpation que les IESVITES
veulent faire de ce College & de
la Chapelle y fondée.*

CESTE CAUSE est de tres-grande
consequence, parce que elle em-
porte la *conservation* ou la *ruine* de L'V-
NIVERSITE' de Paris, de laquelle la
doctrine est si saine que les plus grands
& celebres hommes en pieté & sçauoir
ont dit qu'elle gardoit la clef de la Chre-
stienté. *La conservation est en ce que si*

A



l'VNI^{ERSITE}' gagne ceste Cause, ce sera vn Arrest qui iuffra pour condamner les IESVITES toutesfois & quantes qu'ils feront pareille entreprise, qu'ils entreprendront d'achepter quelqu'un des Colleges desquels est composée l'VNI^{ERSITE}' qui subsiste & sert assiduelement il y a 800. ans & plus, DIEV & le ROY, en montrant à la leunesse les bonnes lettres & sciences & resistant à toutes sortes d'erreurs & de corruptions que les nouvelles doctrines ont produites & contre l'EGLISE & contre l'ESTAT. *La ruine* est en ce que si l'VNI^{ERSITE}' perd ceste Cause, les IESVITES en continuant leur dessein par les artifices & brigues que lon leur veoit iournellement pratiquer, allants de maison en maison rechercher les Enfants des plus grandes & riches familles, mettront & encloront Coliege apres College, & dans peu de rémps toute l'VNI^{ERSITE}' dans leur Societé, qui suiuant ses Constitutions imprimées à Rome en

1583. ne doit auoir
soin de faire instruire
en perfection de vie

a Constitutiones Societatis Iesu, Romæ in collegio eiusdem Societatis anno 1583.

*omnem sententiam ac
iudicium contrarium,
coeca quadam obe-
dientia abnegando.*

*Ibid. se ferri ac regi
sinere debent perinde
ac si cadauer essent.*

*Constitut. part. 5. cap.
3. page 187. Promitto
tibi Patri reuerēdo Pre-
posito Generali Societa-
tis Iesu, locum Dei
tenenti obedientiam.*

ront des Euesques
ou autres admini-
strateurs de ces
Colleges, qui vou-
drōt bien leur ven-
dre, comme a fait le
sieur de BEAUMA-
NOIR, au desceu &
sans y appeller les
principales parties
& plus interessez.

Ainsi que ceste Cause est de tres-
grande consequence, aussi est-elle d'au-
tant iuste pour l'VNIuersite' & pour
le COLLEGE du Mans, qu'il se peut monf-
trer & prouuer par pieces authentiques
que les IESUITES & le sieur de BEA-
MANOIR plaident & agissent contre leur
propre Escrit, contre les Saincts Decrets
& Canons, contre les Ordonnances du
Roy, contre les Arrests du Conseil & des
Parlements; et encore particulierement
les IESUITES contre ce qu'ils ont pro-
mis, contre ce à quoy ils se sont obligez
& soubsmis, contre l'vne des conditions

soubs lesquelles ils ont esté establis & reftablis, qui est, *de n'entreprendre ne faire aucune chose soit pour le Spirituel soit pour le Temporel au preiudice des VNIVERSITEZ.*

L'VNIVERSITE' & le COLLEGE du Mans en monstrant cela, comme ils le monstrent incontinent & sommairement par les veritables *circonstances* du FAICT & par les *raisons* de DROICT qui en resultent; comme aussi par les propres termes des *Escrits* des IESVITES, de leurs *contracts* avec le Sieur de BEAUMANOIR Euesque du Mans, de plusieurs Saints *Decrets* & *Canons*, *Ordonnances* du ROY, *Lettres* patentes de sa Majesté & *Arrests*, Ils esperent tant en la Iustice du ROY qu'ils se promettent d'obtenir leurs fins & conclusions. Que si pour y paruenir en se defendant ils disent des verites, les IESVITES & le Sieur de BEAUMANOIR ne le doiuent trouuer mauuais, puis que ils les ont aggressez par des paroles atroces & calomnieuses & fondé sur icelles leurs *Contracts*, *Lettres* & *Requete*.

LE FAICT de la cause est sommaire,
& tel qu'il ensuit selon la verité des
pieces qui sont representées & pro-
duites.

Le 21. de Novembre 1625. les *Iesuites*
& Messire Charles de Beaumanoir *Euesque*
du Mans se sont desistez du Contract
de vente qu'ils auoient passé ensemble-
ment le 11. d'Octobre precedent : et ont
fait signifier ce *desistement* passé parde-
uant Cutenot & Boucot Notaires au
Chastelet, apres vn *Arrest* du Parlement
de Paris en acquiesçant à iceluy, donné
Monsieur le Procureur General ouy &
suiuant ses cōclusions, sur les Oppositions
formées à l'execution de ce Contract, par
le *Recteur & Vniuersité* & par le Principal
du College du Mans.

Par cet *Arrest* en date du 25. du mesme
mois d'Octobre, la *Cour* a ordonné que
sur les Oppositions formées, les parties au-
roient audience au lendemain S. Martin
lors prochain, auquel iour le Contract se-
roit represēté; *Cependant* sans preiudice de

leurs droicts, inhibitiōs & deffences particulieres faites *aux Iesuites* & au *S^r Euesque* du Mans de faire mettre le contract à execution & de faire aucunes demolitions & nouuel ouurage en consequence d'iceluy, à peine de tous despens dommages & interests: et en cas de contrauention permis aux demandeurs de faire emprisonner les ouuriers.

Cet Arrest signifié *aux Iesuites* & au *sieur Euesque du Mans* avec plusieurs aduenirs, entre autres vn signifié le 5. d'Aoust 1626. par l'Huissier Goizet, *Ils ont* dès le lendemain, sçauoir est le 6. du mesme mois d'Aoust fait signifier & bailer par copie vn *desistement* dudit contract; et ce, afin de n'en venir à l'Audiēce, recognoissants bien qu'ils ne pouuoient en Iustice soustenir leur contract & qu'il estoit nul, ainsi que par cet Arrest il auoit esté preiugé.

En l'an 1631. s'estants imaginez que le temps leur estoit plus propre & propice qu'il n'auoit esté lors de cet Arrest, Ils ont entrepris de reprendre & renouueller ceste affaire, par l'entremise du *sieur de la*

Meschiniere, auquel le sieur Euesque du Mans en a escrit par lettres du 19. de May 1631. en ces termes; *Si l'affaire des Peres Iesuites se pouuoit faire, ie l'aymerois mieux; il n'y a rien qui m'en refroidisse que le peu qu'ils me donnent pour auoir vn logis, ne pouuant estre logé honnestement à moins de 50000. liures, si bien que s'ils me donoient 40000. liures, & que ie n'eusse que 1000. liures du mien à y mettre, alors ie recôpenserois gayement mon Principal & mon Procureur, & leur en fournirois la demission auant trois mois, mais à moins il m'est impossible: C'est ce qui m'a empesché d'y agir puissamment iusques à maintenant.* Voila au vray le subiect de ceste affaire: Tout ce qu'ils disent, estant contraire, ne peut estre veritable.

Au mois d'Octobre 1631. les Iesuites celants ceste verité, & supprimants frauduleusement les Oppositions formées par l'Vniuersité & par le College du Mans, l'Arrest interuenu sur icelles, & l'acquiescement par eux passé en execution de cet Arrest se desistants dudit contract, & la signification qu'ils auoient fait faire à l'V-

niuersité de leur desistement, *ont par surprise*, faux donné à entendre, dol, fraude & calomnies par eux fabriquées, & sous pretexte du bien public, obtenu les Lettres, de la reuocation desquelles il s'agist.

Et par ces Lettres fait ratifier & approuuer ledit contract & vn renouvellement d'iceluy par eux fait le 11. iour d'Octobre dernier avec vn quidam se disant M^e Louis Odespung sieur de la Meschinere, agissant au nom & comme se disant auoir charge, se faisant & portant fort, de Messire Charles *de Beaumanoir* Euesque du Mans.

Pour faire passer & obtenir ces Lettres, Ils ont pris vn pretexte captieux du biē public & du particulier de ce College, supposants qu'il estoit inutile & sans aucun exercice, combien que l'exercice y ait tousiours esté entretenu, & qu'à present la Logique & Phisique y soient encores enseignées avec grand fruit, l'une par Maistre Anthoine *l'Escuyer*, l'autre par Maistre François *Fleury*, tous deux Bacheliers en Theologie de la maison de Sorbonne.

Au mois de Novembre dernier en vertu de ces Lettres , ainsi subrepticement & obrepticement obtenues , les *Iesuites* ont voulu s'emparer de ce College , & pour donner quelque couleur à leur entreprise ils y ont fait venir M^osieur Maistre Anne Mangot sieur de Villarceaux Maistre des Requestes, deux d'entr'eux l'assistants & le suiuaunts avec la *Meschiniere* , l'arier Banquier, & trois se disans Sergents , & quinze ou seize autres armez d'espées & pistolets; et entrants de viue force ont saisi & osté les clefs des mains du Portier : Surprenants ainsi le Principal du College qui est Maistre *Geruais Dassé* Docteur en Theologie, & le Procureur qui est Maistre *Jean Lucas* , & les Boursiers & Professeurs Regents & Estudiants en ce College, leur ont fait faire commandement de se retirer à l'instant & presentement leur faire place nette , & qu'on leur feroit leurs conditions plus aduantageuses , & feroit donné au Principal & Procureur vne pension de 400. liures de rente leur vie durant & quelques bons Benefices : A quoy le

Principal & Procureur ne voulâts consentir & disants constamment qu'ils s'opposeroient & qu'en leur conscience ils estoient obligez de conseruer le bien du College pour les pauvres estudiants de leur patrie & diocese, suivant l'intention du Fondateur, & que desia en ceste mesme affaire eux Interuenâts avec l'Vniuersité principale partie, auoient eu *Arrest* du Parlement l'an 1625. contre ledit sieur *Euesque du Mans* & les *Iesuites*, en suite duquel ils s'estoient departis de leur contract par acte public, Ils les ont fait menacer, leur ont fait dire qu'ils les feroient bien marcher au Conseil, que l'on les mettroit si bas qu'ils auroient peine de s'en releuer, & que l'on empescheroit bien qu'ils n'eussent aucune recompense; Ils ont mesmes menacé plusieurs des Boursiers & autres personnes d'honneur qui estoient avec le Principal & Procureur, de les mettre prisonniers; & pour ce, commandé qu'on allast querir des Archers; comme aussi refusé d'ouurir la porte du College afin que les Regents ne peussent faire leurs Leçons à l'accoustumée: et continuants leurs

violences se sont saisis des clefs du Iardin ainsi qu'ils s'estoient saisis de celles des portes ; les ont toutes emportées ; Et disants au Principal, Procureur & Boursiers qu'ils n'en auoient plus que faire, se sont retirez dans le College de Clermont, sur l'aduis à eux donné que ce iour les Recteur, Doyens, Procureurs, Censeurs & autrés Officiers de l'Vniuersité faisoient leurs visites és Colleges, ainsi qu'ils ont accoustumé & sont obligez de faire pour le deub de leurs charges de temps en tēps, & qu'ils pourroient venir en celuy cy, comme de faict peu de temps apres ils y entrèrent.

Voila comme *les Iesuites* en spoliant les legitimes possesseurs, ont voulu prendre possession de ce College, contre leur propre Escrit, contre l'Arrest du Parlement par eux executé & auquel ils ont acquiescé en se desistant de leur Contract, contre leur promesse de ne rien entreprendre sur les Vniuersitez : Promesse que ils ont faicte & reïteree par plusieurs fois, & autant de fois qu'ils y a d'actes par eux faits & practiquez pour leur establis-

sement en ce Royaume, n'y en ayant aucun qui ne porte expressément telles promesses, & bien particulièrement les Lettres qu'ils ont obtenues du feu Roy Henry le Grand pour estre restablis en ce Royaume, en ayants esté chassés au subiect de l'attentat fait par Chastel leur Escholier.

Ceste entreprise faite par *les Iesuites*, pretextee de faicts calomnieux, a donné subiect à l'Vniuersité de presenter *Requête au Roy*, & à Nosseigneurs de son Conseil, sur laquelle le 18. du mesme mois de Nouembre est interuenu *Arrest*, par lequel le Roy estant en son Conseil tenu à Chasteau-Thierry, a ordonné que le Recteur du College *des Iesuites* de Clermont seroit assigné au Conseil à quinzaine aux fins d'icelle Requête, pour parties ouyes leur estre fait droit ainsi qu'il appartiendra par raison.

L'Arrest ayant esté signifié aux *Iesuites* dès le 26. dudit mois de Nouembre, & assignation à eux donnée à la requête de l'Vniuersité à quinzaine au Conseil de sa Majesté, pour proceder & respōdre aux fins d'iceluy, les *Iesuites* estants comparus, il a esté ordonné le 23. de Ianuier

1632. par Monsieur de Lauzon Commis-
saire en ceste partie, que dans trois iours
les parties se communiqueroient respecti-
vement les pieces desquelles elles enten-
doient s'ayder, escriroient & produiroient
trois iours apres tout ce que bon leur
sembleroit, pour à son rapport au Con-
seil leur estre faict droict ainsi que de
raison.

LES RECTEUR ET VNIVER-
SITE' en satisfaisant à ce Reglement, re-
moñstrent & soustiennent, sauf correction,
qu'ils sont bien fondez en leur Requeste
pour plusieurs raisons;

La premiere, que les *Iesuites & l'Eues-*
que du Mans en supprimant les *Oppositions*
formées à l'execution de leur Contract
par l'Vniuersité & par le College du
Mans, comme aussi *l'Arrest* donné sur
icelles au Parlement de Paris dès le 15.
d'Octobre 1625. *l'acquiescement* qu'ils ont
passé en suite de ce Arrest se desistant du-
dit Contract, & *la signification* qu'ils ont
fait faire à l'Vniuersité de l'acte de leur
desistement, Ils ont subrepticement &
par surprise frauduleuse obtenu ces *Let-*
tres contre l'intention du Roy, lequel a

confirmé par ses Lettres patentes enregistrées en ses Parlements, tous les droits & Priuileges de l'Vniuersité, & par consequent tous les droits & Priuileges des *Colleges desquels l'Vniuersité est composée.*

La seconde raison est, que ces Lettres ont esté obtenuës soubs faux donné à entendre: Le faux est manifeste en premier lieu, en ce qu'ils ont exprimé que le College estoit inutile & sans exercice: et encores à present il y a leçons publiques de Logique & autres parties de Philosophie (qui est la principale science que le fondateur y a voulu estre enseignee) par deux Bacheliers en la faculté de Theologie, Maistres Anthoine Lescuyer & Maistre François Fleury.

*En second lieu, leur faux donné à entendre est manifeste en ce que par les termes sus rapportez de la Lettre, escrite par le sieur Euelque, commençant, *Mon pere Meschinier, mon absence à la campagne m'a empesché &c.* et finissant, *Vostre plus obeissant seruiteur & confrere, l'Euesque du Mans*, il se veoit que rien n'a fait entreprendre ceste affaire que le desir d'en auoir 40000. liures par le sieur Euesque*

du Mans, & l'ambition que les Iesuites ont de s'aggrandir & de mettre, s'ils peuuent, tous les Colleges del'Vniuersité dans leur Societé: Et ils ont exposé par leurs contracts & Lettres que c'estoit *pour le bien public*, que ledit sieur Euesque *vouloit par ceste vnion fauoriser le public, que le public en receuroit aduantage & profit*. Le premier estant vray, comme il est, le dernier est faux.

En troiesme lieu, ils ont exposé, que le College fût finablement tombé en ruïne; et il paroist qu'il est en tres-bon estat: et d'ailleurs, il se voit par le mesme contract, que ce que ils ont dessein de desmolir est la Chapelle, qui n'est point ruïneuse, ains l'vne des plus belles & mieux basties & plus entieres de toutes celles qui sont en l'Vniuersité, comme sont aussi tous les corps de logis du mesme College.

En quatriesme lieu, Ils ont exposé que c'estoit vn Contract d'vnion: et c'est vn Contract de vente, mesme d'vne Chapelle qui est spiritualisée & fondée pour y celebrer le diuin seruice; puis qu'il y a promesse de 33000. liures.

En

En cinquiesme lieu, Ils ont exposé faux *in omittendo*, en ce qu'ils ont obmis les oppositions formées à l'exécution de leur Contract, l'Arrest du Parlement sur icelles, & l'acte de signification du desistement par eux fait de leur Contract en acquiesçant audit Arrest: et ne les ont pas mesme representez à Monsieur Mangot, puis qu'ils ne sont transcrits en son Procès verbal, ainsi que sont le Contract & le renouvellement & les Lettres; et n'y en est fait aucune mention: *Falsum committitur in omittendo sicut in committendo.*

Les Lettres obtenues du Roy sous faux donné à entendre ne peuvent profiter à ceux qui les ont obtenues: C'est ce qui est dit *toto titulo Codicis, Si contra jus vel per mendacium fuerit aliquid postulatum vel impetratum*; comme aussi par Saint Augustin *in Ioannem*, en ces termes; *Iuris esse forensis ut qui in precibus mentitus fuerit, non illi prosit quod impetravit.*

Le Pape mesme ne veut pas que l'on aye esgard aux Lettres Apostoliques ny à ses rescripts, s'il y a subreption, ou faux

donné à entendre ; ains veut que ceste condition , si les suppliques & exposez sont veritables , y soit tousiours sous-entendue , si elle n'y est apposée : C'est la disposition expresse du chap. *Ex parte.* 2. du chap. *Si quando.* 5. du chap. *Super literis.* 20. de *rescriptis* , en ces termes ; *In huiusmodi literis intelligenda est hac conditio etiam si non apponatur , si preces veritate nitantur ---- Patienter sustinebimus , si non feceris , quod praua nobis fuerit insinuatione suggestum --- Mendax precator carere debet prorsus impetratis. -- Qui falsitatem exprimunt , vel supprimunt veritatem , in sue peruersitatis pœnam , nullum ex illis literis commodum consequantur.*

La troisieme raison que l'Vniuersité a pour fonder sa requeste , est , que par Arrest celebre du Conseil d'Estat donné avec tres grande cognoissance de cause le 29. de Novembre 1612. au rapport de Monsieur de Boissize Conseiller d'Estat , notwithstanding l'empeschement formé , & l'euocation demandée au grand Conseil par Messieurs les Cardinaux, l'Vniuersité a esté conseruée en son droit d'auoir ses causes

commises au Parlement de Paris, priuati-
 uement à toutes autres Iurisdic^tions : *Et*
neantmoins par ces Lettres les *Iesuites* en
 supprimant la verité du faict, & comme le
 Parlement estoit saisi, & auoit donné Ar-
 rest, auquel eux mesmes auoient acquie-
 scé, *ont faict* sans cause, sans subiect & sans
 appeller parties, interdire la cognoissance
 de l'affaire au Parlemēt, & icelle reseruer
 au Conseil.

L'Vniuersité de temps immemorial a
 esté conseruée en ce droit d'auoir ses cau-
 ses commises au Parlement, & mesmes
 y a Lettres patentes en date du mois de
 Mars 1445. cōfirmées par sa Majesté avec
 toutes les autres Lettres patentes obte-
 nuës par l'Vniuersité, par lesquelles est
 mandé au Parlement de Paris de cognois-
 tre & determiner des causes & differends
 de l'Vniuersité de Paris & des Supposts
 d'icelle, tout ainsi qu'il feroit en sa propre
 personne si present y estoit. Et conti-
 nuellement elle a iouy de ce droit, ainsi
 mesme que l'on apprēd d'un des plaidoiez
 faict pour le Roy par feu Monsieur du
 Mesnil Aduocat general en la cause d'en-
 tre l'Vniuersité & les *Iesuites*, qui est im-

primé à Paris par l'Angelier en l'an 1594. portant ces termes; *L'Vniuersité a tous-jours esté receüe à plaider en ceste Cour en premiere Instance, non seulement és causes particulieres concernant les Prinuileges d'elle & de ses Supposts; mais aussi és causes concernant le public, & l'Estat de ce Royaume.*

Les Iesuites ne peuuent pas dire que leur Societé merite plus que le corps de Messieurs les Cardinaux: L'Vniuersité par l'Arrest donné au Conseil le 29. de Nouembre 1612. avec tres-grande cognoissance de cause, a esté maintenuë au droict dont est question, nonobstant l'empeschement & l'eucocation demandée par Messieurs les Cardinaux interuenants en cause; Et y en a vne raison, entre autres, qui est tres-juste, & ne peut receuoir de cōtre dict; sçauoir est, que les Docteurs & Professeurs & Supposts de l'Vniuersité, ne doiuent estre distraicts de leurs estudes & lectures, cōme ils seroient s'ils estoient necessitez pour deffendre les causes de l'Vniuersité, ou leurs droicts, de suivre tātost le Conseil d'Estat & Priuë, tātost le Grand Conseil, ou autre Iurisdiction

n'estant permanente à Paris, comme est le Parlement.

P A R C E que dessus il seveoit que les *deux chefs de la Requeste*, de l'entherinement de laquelle il s'agist, sont conformes aux Loix & Ordonnances du Roy & à ce qui a esté de tout tēps obserué en Iustice: voire mesme sont ja iugez par Arrests du Conseil donnez sur pareils differends: *L'un* est que ces Lettres par surprise obtenües de sa Majesté soient reuouquées; Cela est iugé non seulement par l'Arrest donné au profit de l'Vniuersité d'Angers le 4. de Iuillet 1631. mais aussi par Arrest donné contre les Iesuites mesmes sur semblables Lettres aussi subrepticement par eux obtenües, pour s'emparer du College de Ponthoise le 13. de Feurier 1624. *L'autre* est, que pour proceder sur les oppositions les parties soient renuoyées au Parlement de Paris; Cela est iugé aussi par plusieurs Arrests, & bien particulièrement par celuy donné le 29. de Nouembre 1612. contre vn Corps avec lequel la Societé des *Iesuites* ne peut se comparer: Et ce, combien que le Parlement ne fut saisi de l'affaire, & n'eust donné Arrest.

sur icelle, comme il a donné sur ceste-cy.

Av FONDS, s'il est besoin de traiter de l'affaire, & que le Roy en son Conseil en vueille retenir la cognoissance pour la iuger sans la renvoyer en son Parlement, contre ce que l'Vniuersité demande par sa Requête: *les Recteur, Doyens, Procureurs & Supposts de l'Vniuersité, comme aussi les Principal, Procureur & Boursiers du College du Mans* peuuent monstrier que les Contracts de vente desquels il s'agist, ne peuuent subsister en Iustice, ains sont nuls de toutes nullitez, comme aussi illicites & illegitimes, *tant parce* que ils sont simoniaques; *que parce* que ils sont faits par personnes qui n'ont pouuoir, ny droict, ny raison de les faire; *que parce* qu'ils sont non seulement cōtraires à la Fondation & aux Statuts du College du Mans, duquel il s'agist, mais aussi aux Sts Decrets & Canons, Loix & Ordonnances du Roy, Arrests du Conseil & du Parlement, Statuts de l'Vniuersité, & aux Lettres patentes que les Iesuites mesmes ont obtenues pour se faire establir & restablir en ce Royaume, duquel ils auoient esté bannis pour la cause que tout le monde sçait.

LA SIMONIE est toute manifeste és
 Contrac̃ts desquels est question, d'autant
 que par iceux est vendu pour 33000. liures
une Chapelle avec le College, pour la-
 quelle posseder il faut estre Prestre dans
 l'an (ce qui monstre qu'elle est Presbyte-
 rale à *fundatione*) fault prendre tiltre de
 l'Euesque, ou du Superieur, & dire & cele-
 brer grandes Messes: Cela ne peut estre
 denié, ny reuoqué en doute, puis que la
 fondation & les statuts de ce College por-
 tent, que celuy qui sera pourueu de ceste
 Chapelle sera Prestre, ou se fera promou-
 uoir a l'ordre de Prestrise dans l'an, et s'il
 ne le fait que la Chapelle vaquera *ipso iure*;
 que le sieur Euesque est tenu dans qua-
 tre mois d'en pourueoir vn autre; & s'il ne
 le fait dans les quatre mois, le droict de
 conferer est deuolu à l'Archeuesque de
 Tours, comme Metropolitain de celuy
 du Mans, & de luy au Primat, & ainsi de
 degré en degré, de Superieur en Super-
 ieur. Les termes sont; *Ex dictis duo-*
decim vnus erit Procurator, ac Capellanus
Collegij, qui similiter ante eius institutio-
nem in dicto officio erit artium Magister,
qui tenebitur se promoueri facere ad sa-

cerdotium infra annum si Presbyter tunc non esset, alioquin anno elapso ipso facto, sine vlla vltiori declaratione, si ad sacerdotium se promoueri non fecerit, vacabit dicta bursa vnà cum dicto officio Procurationis; tenebiturque Episcopus Cenomanensis illam alteri conferre intra quatuor menses à tempore vacationis, infra quos si non prouiderit, illis elapsis ius conferendi erit deuolutum ad Archiepiscopum Turonensem Metropolitanum ipsius Episcopi Cenomanensis, &c. Il est aussi dit par ces Statuts que le Titulaire de ceste Chapelle dira grâde Messe, Vespres, Vigiles, Messes de Requiem. Les termes sont, *Tenebitur Capellanus qualibet hebdomada celebrare tres Missas in Capella dicti Collegij, & in illis collectam seu memoriam facere pro anima Philippi Cardinalis fundatoris* ----- *Et diebus Dominicis & Festiuis celebrabit alta voce, & etiam Vesperas prefatis diebus Dominicis, Lune & Veneris & Sabbati.* Cela estant ceste Chapelle est vn Benefice, & ne peut estre vendue ny acheptée sans simonie.

Auec quelle apparence le sieur de Beaumanoir Euesque du Mans & les Iesuites, qui se disent grâds Docteurs & directeurs

de conscience, peuuent ils demander au Roy & à son Conseil qu'ils approuuent, & facēt subsister à leur profit, la vente d'une Chapelle qui est presbyterale à *fundatione*, fondée pour dire par le pourueu & titulaire d'icelle, grand' Messe, & Vespres tous les iours de Dimanches & de Festes de chacune année, & és iours des 4. Temps Vigiles & Messes de Requiem? Y eut-il iamais Simonie plus manifeste & plus insigne que la vête de ceste Chapelle, qui est vraiment benefice, soit que l'on considere qu'il faut auoir tiltre de l'Euesque ou de son Superieur, soit que l'on considere que pour la tenir il faut estre Prestre, dire & celebret grand' Messe, soit que l'on considere que le Titulaire est perpetuel, puis qu'il est dit par les Statuts qu'il n'en peut estre démis, si ce n'est qu'il aye vn benefice de 200. liures *in portatis*.

Par la disposition du droit Canon, au chap. 8. de *Pactis*, il est dit; *Pactiones factæ pro quibusdam spiritualibus obtinendis, cum in huiusmodi omnis pactio, omnisque conuentio debeat omnino cessare, nullius penitus sunt momenti*. Comme aussi est-il dit au chap. 7. de *Transactionibus*, en ces termes

decisifs de ceste question; *Res sacra vt possideatur aliquo dato vel retento, seu promisso, speciem credimus habere Simonie.*

IL EST aussi vray que ces contracts sont faits par personnes qui n'ont pouuoir, ny droict ny raison de les faire: Car ce College n'appartient point au sieur Euesque du Mans, qui le vend; il n'y a iamais rien contribué, & n'y a rien estéourny du patrimoine de l'Euesché; mais bien les Exécuteurs du testament du Fondateur ont acheté vne maison si ruinée qu'elle ne pouuoit estre habitée, & pour laquelle apres information deuëment faite *super cōmodo & incōmodo*, il n'a esté constitué que 25. liures de rente accordée estre rachetable par le College toutesfois & quantes; et la Chapelle & vne partie des logemens sont bastis sur autre terre qui a esté acquise des Religieux de Marmoustier & aultres: Cela se voit par ce qui est dit au commencement des Statuts; *Ibi erat domus quedam ruinosa quæ vix ab aliquo, pretextu ruine, incolebatur, quæ erat de patrimonio Episcopatus ---- ad onus soluendi per Procuratorem Bursariorum & Collegij summam viginti quinque librarum annui re-*

ditus eidem Domino Ludonico Episcopo & suis successoribus in Episcopatu, hac conditione adiecta quod cum primum dicti Bursarii eidem Domino & suis successoribus in Episcopatu, cument & tradent unam medietariam in feodo de Tholmo seu alio, indemnifatam in Episcopatu Cenomanensi, huiusmodi redditus 25. librarum cessabit & extinctus erit. On en eueu auoir autant ailleurs pour mesme pris; et le College n'eust laissé d'estre basti, le Fondateur n'ayant point designé ce lieu ny aucun autre, & s'estant contenté de laisser de l'argent suffisamment pour satisfaire à son intention, ainsi que il se veoit clairement par les Statuts.

Et ne fait rien au contraire de dire que le sieur Euesque par les mesmes Statuts a la collation des Bourses : Car ces Statuts portent aussi que le College a pour Protecteur & Surintendant le Chancelier de l'Eglise de Nostre-Dame de Paris, tant pour la discipline que pour l'administration du reuenu de la maison; et pour la collation de ceste Chapelle et des Bourses, l'Archeuesque de Tours; et où il y manqueroit, le Primat, & ainsi de degré en

degré, de Supérieur en Supérieur: Comme aussi est-il dit que si l'Euesque fait quelque chose contraire aux Statuts il sera nul, & le Principal, Procureur, & Boursiers pourront s'y opposer, & ne pourra mesme le Pape en dispenser. Les termes sont;

Ordinauerunt unum Protectorem & Superintendentem de urbe Parisiensi dandum, optantque quod huiusmodi onus dignetur accipere.-----Cancellarius Ecclesie Parisiensis, ----rogantque dicti executores per viscera misericordie Domini nostri Iesu Christi prefatum Dominum Cancellarium huiusmodi visitationem facere.--- Nec poterit Dominus Episcopus Cenomanensis aliquam de dictis magisterio, Capellania & Bursis conferre, nisi nato & orto de dicta diœcesi Cœnomanensi.--- Quod si contra fecerit erit, ipso facto collatio nulla, iusque conferendi deuolutum erit ad Archiepiscopum Turonensem, qui similiter si contra fecerit conferendo non diœcesano, ipso facto ius pro illa vice conferendi deuoluetur ad Primatem & sic consequenter gradatim de Superiore in Superiorem. --- Si secus fecerit dictus Episcopus, pro infecto habeatur; nec permittant Primarius, Procurator &

*Barfarij in contrarium facere. --- Nec su-
per & contra presens statutum valeat à
summo Pontifice, vel Apostolica sedis legato,
Episcopo Cenomanensi seu quouis alio dispen-
sari.*

Cecy montre bien certainement com-
me avec tresiuste raison, l'Vniuersité non
seulement reuoque en doute, mais dénie
formellement que les Euesques du Mans
predecesseurs de celuy qui en porte à pre-
sent le nom & qui a vendu pour 33000.
liures ce College fondé pour les pauures,
& la Chapelle qui y est spiritualisée, inter-
uenant pour les Iesuitès en ceste instance,
ayent fondé ce College; et que tant s'en
faut que la plaine disposition d'iceluy leur
appartienne qu'elle leur est interdite, *ad
tollendam omnem ruinae occasionem tam in
viviis quam in mortuis lapidibus*, ce sont les
termes inferez és Statuts, par les execu-
teurs du Testamēt de l'Illustrissime Cardi-
nal de Luxembourg, preuoyāt & voulant
empescher ce qui se veoit aujourd'huy,
*Episcoporum & collatorum seu etiam Offi-
ciariorum vsurpationem --- qui faciliter au-
dent attentare & contraire voluntati Fun-
datorum.*

Ledit sieur Euesque sçait bien que tout ainsi qu'il veut vendre ce College, qui ne luy appartient point, ains aux pauvres qui se trouuerront capables d'estudier, natifs du diocese qu'il detient; aussi laisse il deperir & ruiner le Chasteau d'Yury l'Euesque, appellé le Palais Episcopal, qu'ice-luy sieur Cardinal de Luxembourg a fait bastir à deux lieues du Mans: Ce qu'il ne peut faire sans faire perdre à l'Eglise, ainsi qu'aux pauvres, le biē qu'il ne leur a point procuré, & encore moins donné; et par mesme moyen estouffer la memoire d'un bon Euesque du Mans lequel a mieux ay-mé bastir & fonder à Paris vne maison pour les pauvres que d'y en reestabliir pour ses successeurs vne qui estoit deperie du temps de ses predecesseurs en l'Euesché, ce que l'Illustrissime Cardinal Louys de Bourbon, qui a esté Euesque apres luy a suiuy & confirmé; l'un & l'autre preuoyants bien que ceste maison rebastie ne pourroit seruir qu'à donner occasion à quelques-vns de ceux qui succederoient en l'Euesché, de ne resider en leur diocese, d'estre Euesque de Cour, & non Euesque d'Eglise.

S'il suffit de dire qu'un administrateur laisse deperir le bien, pour l'oster à ceux pour lesquels il a esté donné, il faut oster aux Euesques du Mans le Palais Episcopal, le Chasteau d'Yury, que le sieur de Beaumanoir laisse ruïner: Il est d'autant vray qu'il laisse ruïner ce Palais & Chasteau Episcopal, qu'il est supposé par sa Requeste d'interuention, ainsi que par ses Contracts, que les administrateurs du College du Mans le laissent tomber en ruïne.

Il ne peut dire ce qui est exposé par sa Requeste sans se condamner soy. mesme, & se conuaincre de ne faire ce a quoy sa charge & qualité d'Euesque, comme aussi sa conscience l'obligent, qui est de faire instruire soigneusement les Escholiers & entretenir les bastimens de ce College.

Sur ce il luy peut estre dit avec iuste raison, qu'il ne fait ce qu'il doit, & veut faire ce qu'il ne doit pas: Il ne cōserue ce College du Mans qu'il doit cōseruer: Il veut augmenter celuy de Clermont, qu'il ne doit augmenter: Il ne frequente ny ne visite le College de son diocese qu'il doit visiter,

Il frequente celuy des Iesuites qu'il n'est obligé de frequenter.

Les Informations qu'il allegue par sa Requête, estants raportées, il se prouuera que les y desnommez estoient Escholiers *des Iesuites*, allants au College de Clermont.

S'il frequentoit, comme il est obligé, puis qu'il veut estre Euesque du Mans, le College du Mans, il y auroit entendu enseigner la Philosophie par deux Bacheliers de Sorbonne, aussi bien voire mieux qu'au College de Clermont, & sans aller de maison en maison briguer & rechercher les Escholiers, comme font *les Iesuites*, ainsi qu'il est notoire à tout Paris, voire à toute la France, voire à tout le monde où ils ont peu planter leur Societé. Mauuais plant, s'il en fut iamais, puis qu'il ne tend qu'à s'estendre en faisant mourir les Vniuersitez, pepinieres de toutes les bonnes sciences.

Les affiches mises de temps en temps, encore ceste année, & de la part de deux Bacheliers en Theologie, pour denoncer aux Escholiers leurs leçons & exercices,
les

les Theses soustenuës par leurs Escholiers qui sont produites en ceste instance, font veoir avec quelle verité il est dit par ledit sieur Euesque & par les *Iesuites*, que ce College est sans exercice.

Si le sieur de BEAUMANOIR Euesque, ou plustost les *Iesuites* qui le font parler, comme il leur plaist, s'estoient resouuenus que le 6. d'Octobre 1614. Sentence a esté donnée par le Préuost de Paris ou son Lieutenant ciuil, contre François Lorient l'un d'entr'eux, par laquelle deffences leur sont faites de tenir au College de Clermont aulcunes presses, caracteres & vtenfiles de Librairie, Imprimerie & Relieure, *Ils n'auroient pas reproché & mis dans leur Requête, que Cramoisy a eu vn magasin de liures d'as le College du Mans.* Quand ils font de telles reproches & objections, ils tesmoignent bien qu'ils se resouuiennent tres-mal, ou pratiquent fort mal le Commandement de Nostre Seigneur, qui dit en l'Euangile de Saint Luc chap. 6. *Hypocrita eijce primum trabem de oculo tuo, & tunc perspicies, vt educas festucam de oculo fratris tui;* Hypocrite lette premierement le cheuron hors de ton œil

& adonc tu regarderas le moyen de jetter hors le festu qui est en l'œil de ton frere.

Les offres qui sont faictes par la Requête d'interuention au nom du sieur Euesque du Mans paroissent encores inciuiles & iniustes, parce que il offre 250. liures au Principal, qui est vn Docteur en Theologie, & 200. liures au Procureur qui est le Chapelain, pour les rendre participants dela vente de ce College auquel est annexée & fondee vne Chapelle, c'est à dire, de sa Simonie.

Voila pour ce qui est du Vendeur, & des pretextes pris tant par ses Contracts que par sa Requête, pour soustenir la vête & dissipation de ce College & de la Chapelle y fondée, c'est à dire du bien des pauvres & de l'Eglise : Ecclesiam fraudare sacrilegium est, & accepisse quod pauperibus erogandum sit, aut quod apertissimi sceleris est, aliquid inde subtrahere, omnium prædonum crudelitatem superat, dict le canon, Gloria. ca. 12. qu. 2. qui est tiré de S. Hierosme ad Nepotianum, de vita clericorum.

Il sera aussi particulierement monstré quels sont les *Achepteurs*, apres auoir remarqué & fait veoir comme ces Cōtracts

sont contraires à la *Fondation* & aux *Statuts* de ce College, ainsi que aux *Saincts Decrets & Canons* : entr'autres contrariez, il y a celle-cy;

Par les Statuts il est dit que le sieur Euesque du Mâs sera Collateur des Bourses de ce College, et que le Chancelier de l'Eglise de Paris sera Protecteur & Surintendant: *Et par ce Contract* il est dit qu'au sieur Euesque du Mans appartient la pleine disposition du College.

Par les Statuts il est dit que si l'Euesque contreuient aux Statuts, le Principal, Procureur & Boursiers luy doiuent resister; aussi est-il dit que si la Chapelle & les Bourses ne sont par luy conferez ainsi qu'il est prescrit, l'Archeuesque de Tours les conferera: *Et par ce Contract* il est dit que au sieur Euesque du Mans appartient la pleine disposition du College.

Par les Statuts & par la Fondation il est dit, qu'il y aura 12. Boursiers, desquels l'un sera Principal du College, & l'autre Procureur: *Par ce Contract* il est dit, qu'il n'y aura que 5. Escholiers.

Par ces Statuts il est dit qu'il sera célébré Messe à haulte uoix les iours de Di-

manches & de Festes, & Vigiles pour les Morts & Messes de Requiem aux iours des 4. temps par le Procureur du College, qui fera le Chapelain, ou par le Principal, assistants les Boursiers. *Et par ce Contract* il est dit, que pour l'obligation des Messes & Objts de la Fondation, les Estudiants en sont totalement deschargez ; Aussi est-il constant par les constitutions des *Iesuites* qu'ils ne disent point de grandes Messes.

Par les Statuts, Il est dit, qu'il y aura douze Boursiers desquels l'un sera Principal, l'autre Procureur & Chapellain : *Et par ce Contract*, Il est dict qu'il n'y aura que cinq Escholiers.

Par la Fondation & par les Statuts, ce College est affecté à douze pauvres qui seront iugez propres à estudier, *Et par ce Contract*, Il est donné à cinq, sans distinction de pauvres ou de riches, tels que l'Euesque voudra choisir, c'est à dire, ses parens, ses amis, ses favoris : aussi les appellent-ils Escholiers pour supprimer le nom de Boursiers & de Pauvres.

Par la Fondation & par les Statuts, il est dit que les Boursiers demeureront au Col-

lege: *Et par ce Contract* les Iesuites font sortir du College les Boursiers qui y sont à present, & stipulent de les loger ailleurs.

Par ces Statuts, il est dit que Philippe de Luxembourg Cardinal Legat en France a fondé & doté ce College de ses biens meubles, *de bonis suis mobilibus*. *Et par ce Contract*, il est dit que ce College est de l'ancien patrimoine de l'Euesché du Mans.

Que si l'on dit que par les mesmes Statuts il est dit que c'estoit vne maison de l'ancien patrimoine de l'Euesché du Mans, l'on respond qu'il est aussi dit par ces Statuts que ceste maison estoit si ruinée que personne ne la pouuoit habiter, & de si peu de valeur qu'elle a esté delaissée pour 25. liures de rente, rachéptable par ce College toutesfois & quantes: Et la Chapelle a esté bastie sur autre terre acquise des Religieux de Marmontier en 1524. comme aussi vne autre partie des bastimens du College, dont il est encore payé rente: Et pour estre ce College affecté aux pauures du diocèse du Mans, il ne s'ensuit pas qu'il ayt esté fondé du patrimoine de l'Euesché: C'en'a esté que par

ce que le Fondateur Monsieur le Cardinal de Luxembourg estoit lors Euesque du Mans.

Par la Fondation & par les Statuts, Il est dit que l'Euesque du Mans ne pourra rien faire, non pas mesme conferer vne seule des Bourses au contraire des Statuts à peine de nullité : *Et par ce Contract*, le sieur de Beaumanoir en qualité d'Euesque du Mans aliene, & dispose entierement tant du fonds que du reuenu de ce College.

Par la Fondation & par les Statuts, Il est dit que non seulement l'Euesque du Mans, mais le Legat ny le Pape mesme ne pourra rien faire qui y soit contraire ou y preiudicie : *Et par ce Contract*, Le sieur de Beaumanoir, comme Euesque du Mans, abolit tous les Statuts en vendant ce College avec la Chapelle, & les faisants passer en main Estrangere en les trāsportant aux Iesuites qui par vne obeissance aueugle dont ils font vœu, dependent d'un General qui iusques à present a tousiours esté Estranger, Espagnol ou subiect à l'Espagne.

IL EST VRAY, que ce Contract &

d'vsurper le bien qui a esté donné pour les
pauures, ou pour fonder des Eglises &
Chapelles, esquelles le diuin seruice soit
fait & celebré.

*Aux Arrests du Conseil & des Parle-
ments*, par lesquels sont reprobuées &
declarées nulles les alienations des Col-
leges & places & charges qui appartiennent
aux Vniuersitez, & les Lettres pa-
rentes subrepticement obtenues pour
les autoriser, sont reuocquées; tesmoing
l'Arrest de Ponthoise donné au Conseil
d'Estat le 13. de Feurier 1624. par le-
quel sont reuocquées les Lettres obte-
nues par les *Iesuites* pour s'attribuer le
College de Ponthoise fondé pour Clercs
seculiers; tesmoins aussi *les autres Ar-
rests* sus-rapportez, celuy donné au
Conseil d'Estat le 4. de Iuillet 1631. pour
l'Vniuersité d'Angers, & ceux donnez au
Parlemēt pour le College des Lombards;
pour le College de Boncourt, & particu-
lièrement pour le College du Mans *in in-
diuiduo*, s'agissant du mesme faict & entre
les mesmes parties.

Aux Status de l'Vniuersité autorisez
par Lettres patentes du feu Roy Henry le

Grand, qui defendent aussi l'alienation des Colleges ou de partie d'iceux, mesmes d'y retirer ny loger autres personnes que des Escholiers pour lesquels ils sont fondez, & veulent que les Escholiers y soient entretenus & enseignez suivant l'intention des Fondateurs; *Collegiorum possessiones minimè vaneant, permutentur, oppignerentur: Si quid secus fiat, id irritum esto*, ce sont les termes de l'art. 69. de facultate artium.

Aux Lettres obtenues par les Iesuites mesmes pour se faire establir & reestablir en ce Royaume, qui portent que les Iesuites ne feront aucune entreprise sur les Vniuersitez. Il ne s'en peut pas veoir vne plus manifeste ny vne intrusion plus violente que celle de laquelle est question.

Les Iesuites qui sont les Achepteurs de ce College & de la Chapelle dont il s'agit, pour donner quelque couleur à leur vsurpation ont exposé & supposé, mesmes au Roy, que ce College estoit inutile & sans aucun exercice; et il est notoire à tous ceux qui frequentent l'Vniuersité que l'exercice des Lettres & Sciences y a tousiours esté entretenu, & qu'à present sont enco-



res enseignées la Logique & autres parties de la Philosophie par Maistre Anthoine Lescuyer & par Maistre François Fleury tous deux Bacheliers en Theologie de la maison de Sorbonne : Il se veoit par les termes des Statuts comme la Logique est la principale Science que le Fondateur du College y a voulu estre enseignée.

L'on n'a iamais faiçt plus d'exercice des Lettres dans ce College que l'on en faiçt à present: Il y a tousiours eu leçons en Logique & autres parties de la Philosophie, comme il y a. Il est vray & cela est notoire que ce College & celuy de Rheims se sont autresfois ioinçts pour faire l'exercice complet des Lettres & Sciences; et à cet effect il y a eu yne tra-uerse en la ruë qui est entre les deux Colleges pour passer de l'vn à l'autre. Mais si le College de Rheims à cessé l'exercice, celuy du Mans n'en doit estre ruiné. Cela doit estre plustost imputé aux *Iesuites* qu'à aucun autre, pour auoir fait vn College en la ville de Rheims, & par ce moyen destourné les Escholiers du diocese de Rheims de venir à Paris.

Ils disent aussi par leur Contract que

c'est pour faciliter & accommoder les exercices de leur College, comme si pour les accommoder il failloit incommoder & ruiner les autres. Ils auroient eu assez de place & de logis pour doubler leurs classes, s'ils n'auoient apprehendé la Iustice, sur la Requête présentée par l'Vniuersité au Parlement pour les en empescher, s'estants desistez de ceste entreprise, apres auoir veu les moyens deduits par la Requête qui est produite en ceste Instance.

Ils sont les premiers portants qualité de Religieux qui ayent entrepris d'auoir en mesme ville trois diuerses Maisons, trois maisons separées l'une de l'autre, & en diuers endroits.

En la Rue de Sainct Iacques ils ont le College de Clermont. N'estants pas contents de l'auoir comme il estoit auparavant leur bannissement, *Ils l'ont* accreu de huit maisons du costé de la Rue sainct Iacques les plus voisines, qu'ils ont acheptees, sçauoir est,

La Maison ioignant le College de Marmoustier, où estoit pour enseigne Sainct Martin, & depuis l'Escharpe blanche, consistant en trois corps de logis deuant, au

Dans le logement des Peres, outre les aultres corps de Logis, il y en a vn grand, entre le Iardin & la Court, dedans lequel il y a vne grande sale qui ne sert qu'à faire promener ceux qui viennent visiter les Peres: vne sale haulte encore plus spacieuse, & plus longue que la basse qui ne sert qu'au Pere Recteur pour y receuoir ses visites.

L'estage de dessus, qui est le troisieme, de pareille estendue que le second, est vn magazin de Liures & escrits: dans le mesme departement des Peres sont aussi four, boulangerie, grenier, differents de ceux des pensionnaires.

L'on sçait comme leur Pere Cotton en 1623. au mois de Septembre, le Roy estant à Tours, demanda en pleine assemblée des Religieux de Marmoustier, leur College de Paris & celuy du Plessis, qui sont de mesme fondation, & pour les y porter les assoura qu'il en auoit la parole & promesse de feu mōsieur le Grand Prieur, & leur promettoit telle recompense qu'il leur plairoit & en general & en particulier.

L'on sçait aussi comme ils ont long

temps y a , formé dessein sur le College des Cholets ; et comme ils en sont venus iusques à faire marquer, comme par Fourriers, des logements pour quelques vns de leurs Escholiers, entr'autres pour Monsieur le Comte de Moret, ont voulu faire faire vne ouuerture & porte dans le mur qui separe les deux Colleges: ce que Monsieur le Chancellier de Sillery empescha apres en auoir eu le commandement exprés de sa Majesté.

En la Ruë Saint Anthoine, l'on vçoit à present comme soubs pretexte d'auoir vne Chapelle ou Oratoire, avec vne simple Maison pour leurs Profes, qu'ils disent estre Mandiants, Ils y ont acquis plusieurs maisons & hostels; entre autres, vne maison sise ruë saint Anthoine, proche leur Chapelle cōtenant plusieurs demeures, & deux Boutiques qu'ils loïent à vn nommé Chaillou, marchand tapissier.

L'Hostel du sieur de Champforest où il faisoit depuis peu sa demeure, sur le deuant duquel il y auoit plusieurs maisons en dependants, entr'autres vne en laquelle estoit demeurant vn boulanger nommé Tronquet, & depuis sa vesue, en l'autre

une marchande lingere , & vn fourbisseur d'espée.

Deux ou trois autres Maisons ayants trois boutiques qu'ils ont acheptées du sieur de Villegagnon , l'une desdites boutiques & partie desdits lieux occupez par vn nommé Lesquier marchand espicier, l'autre par le nommé le Roy , maistre Barbier & Chirurgien , & depuis par sa vefue , & la troisieme tenuë par Fieffé Notaire.

Ils ont encores plusieurs grands corps de logis qu'ils ont fait accommoder pour le logement de plusieurs particuliers dans la maison Professe , par eux cy-deuant occupée, de laquelle la principale porte & entrée est encores deuât l'Eglise de Saint Paul , & aux costez de ceste principale entrée il y a deux logis , en l'un desquels est demeurant vn Apothicaire, & en l'autre vn Serrurier.

Ils ont dans la ruelle appellée des Prestres, ou ruë de Ioüy , deuant l'Eglise Saint Paul , vn hostel, duquel ils se seruent maintenant, qu'ils ont acquis du sieur de S. Germain le Grand.

Ils ont ioignant ledit hostel vn autre

grand Hostel qui a appartenu au sieur Morant Thresorier de l'Espargne, lequel ils ont achepté pour la somme de cent mil liures.

Depuis peu de temps ils ont aussi acquis vn grand Hostel, lieu & iardin vulgairement appellé la Folie Regnault.

Aux Faulxbourgs de Saint Germain ils ont leur Nouitiat qui a trois grandes portes carocieres, deux grands iardins & leur Eglise, le tout contenant plus d'un arpent de terre; et vne grande maison separée qu'ils font tenir par Montery l'un de leurs agents.

Ils ont encores au College de Clermont, & en leur Nouitiat, plusieurs benefices qu'ils y ont fait vnir, & encores de naguieres l'Abbaye de la Couronne qui vault plus de 12000. liures par an, & en rentes sur l'Hostel de Ville & autres vne tres-grande somme; et en outre, les pensionnaires qu'ils vont mandians par toutes les bonnes maisons tant des villes que des champs; de chacun desquels ils tirent deux cens quarante liures, sans y comprendre le gain qu'ils font sur ce qu'ils
leur

d'icelle sous pretexte de conscience.

On sçait pareillement comme ils ont toutes sortes de mestiers chez eux, comme ils fournissent & vèdnt à leurs Escho- liers le papier, les escritoirs, l'ancre & les plumes, portefueilles, liures & autres necessitez, pourquoy les artisans & marchands ne gagnent rien avec eux: Et s'ils acheptent de quelques vns c'est pour y regagner, encores vsent ils de monopole, n'en ayant qu'un ou deux qui les fournisse, tellement que les autres marchands & artisans avec leurs femmes & enfans mourroient de faim & de pauvreté, s'il n'y auoit d'autres qu'eux qui acheptassent de leur marchandise, & qui les feissent travailler en leur vacation. L'on sçait, & chacun le veoit, comme ils vont eux mesmes aux marchez, & au deuât des denrées, font leurs prouisions de telle sorte qu'ils en peuuent reuendre.

Ils ont obtenu Lettres qu'ils ont fait par Iussions enregister en la Cour des Aydes, par lesquelles ils se sont fait exempter de toutes aides, entrées & impositions, tant par eauë que par terre, tant anciennes que nouuelles, tant mises qu'à mettre sur la

ville de Paris, & particulièrement de celles du vin, pour trois cens muids par chacun an. Cela se veoit par deux Arrests de la Cour des Aydes, l'un en date du 1. de Iuillet 1623. l'autre en date du 21. de Mars 1631.

Ainsi de quelque façon que l'on le veille prédre, le bien public duquel ils se veulent preualoir, n'est qu'un pretexte du tout captieux & frauduleux qu'ils prennent pour couvrir leur entreprise & le pernicious desir & dessein qu'ils ont de diminuer & ruiner s'ils peuuent les forces de l'Vniuersité, qui consistent principalement és Colleges; et ce, en continuant leur premier dessein qui est de la reduire à quatre ou cinq Colleges, s'imaginants que s'il n'y en auoit point 40. ou 50. comme il y a (ce qui la fait subsister depuis 800. ans & plus) & qu'elle fut reduite à 4. ou 5. il leur seroit facile de la rendre sans exercice, & par ce moyen faire qu'il ne se trouueroit plus personne qui les peust contredire en leur mauuaise doctrine & manifester & s'opposer à leurs desseings: de sorte qu'ils auroient l'Empire absolu des sciences & des consciences, auquel ils aspirent avec

